

滇雲歷年傳

滇雲歷年傳卷七

雲南叢書史部之一

契臯老人倪蛻輯

曾孫慎樞梅岑恭校

起明英宗正統六年盡正德十六年

六年正月遣定西伯蔣貴爲平蠻將軍兵部尙書王驥
提督軍務南征麓川

史先是思任爲刀賓王部目遣至黔國公所晟固以
兒子畜之故反後屢次撫諭不欲加兵及兵至潞江
又受其愚遷延不進以致方政憤激渡江孤軍覆沒
晟亦飲酖自戕沐昂復征軍抵隴把張榮大敗詔責
沐昂吳亮馬翔一時被逮已而進屯孟羅據者章硬

寨沐昂力攻破之雖少挫而鴟張如故至是聞朝廷
大舉征之乃始遣使謝罪太監王振議討大學士楊
士奇謂遠蠻不足較宜爲耕守計振執不可侍讀劉
球上言帝王馭夷不窮兵於小醜以傷生靈惟防患
於大寇以安中國今思任依阻山谷悔過乞降臣愚
以爲麓川僻陋滅之不爲武釋之不爲怯特降璽書
原其罪過固結木邦以爲我援分屯金齒以離彼黨
不報時王振倖用事好邊功因與王驥謀力請發兵
討之上乃命定西伯蔣貴爲平蠻將軍充總兵官都
督同知李安充副總兵都督僉事劉聚充右副總兵

都督指揮使宮聚充方有半都指揮僉事再保充右
叅將太監曹吉祥兼都軍務兵部尙書兼大理寺卿
王驥提督軍務便宜賞罰侍郎徐禧督餉率京營湖
川兩廣等處兵馬一十五萬往征轉餉半天下驥又
奏舉廷臣太僕少卿李蕡兵部郎中侯璉楊安主事
蔣琳等行間叅贊陞辭上賜驥貴等金兜鍪細鎧弓
矢蟒衣緋衣以行

蜚按田汝成炎微紀聞附論曰麓川之役舉朝皆以
爲非謂王振專權逞忿而李文達公亦言麓川初叛
不委晟而遣別將遂至喪師此皆失實思任抗王師

殲大將屠郡邑坑軍餘罪大惡極釋而不誅辱國宥
兇莫甚於此故振雖罪惡滔天若主征麓川義正言
順不可非也其言頗非拾唾愚嘗謂勝國三百年中
征蠻屢矣而滇之麓川黔之播州雖堯舜亦所必誅
政不得因王振居中用事而據斥爲好大喜功也
詔增雲貴鄉試舉人五名雲南三人貴州二人

夏五月王驥蔣貴率師至雲南發兵援大侯州破之

野史時賊困大侯州甚急衆謂瘴月不宜進兵驥不
聽乃命都指揮馬讓率大理諸衛六千赴援以兵部
郎中侯璉督戰破之斬首數百獲其象馬

詔賜故翰林待制王禕官賜諡忠文

野史王禕死節後於建文元年贈官學士賜諡文節
後永樂初於建文之政一切革除至是義烏丞劉傑
請於朝復有是命仍贈翰林學士

秋八月鄉試雲貴生儒取劉璽等二十人

通志內貴州六名舉進士者王倣貴州人

十月總督雲南軍務兵部尙書兼大理寺卿王驥奏雲
南按察司僉事徐觀大理知府賈銓楚雄知府馮洧督
運有方乞量陞轉以示褒勸

史章下吏部尙書郭璉請如驥請上曰賊未平而陞

餽運之官先事也功成後論叙班賞人其孰不然璉
頓首謝

十一月王驥大破麓川賊思任於金沙江

史先是兵旣集金齒驥分爲三道命右叅將冉保率
衆三萬自東路入以侯璉爲監督驥督蔣貴率師從
東路及西路以進是月五日俱會於上江夾攻三日
不下驥令縱火焚柵因督衆乘之力戰斬首數萬級
賊衆敗走保沙木籠山在南甸南百里據險爲連環
七寨驥益麾兵深入攻其中寨各哨俱奮大破之
蛻按上江乃潞江舊稱大金沙江而誤指爲禹貢之

黑水者也其實另在北金沙江不入雲南境內環於
番蠻絕域之外至緬甸江頭城而下南海者方是禹
貢所載之黑水也

閏十一月王驥復破麓川賊於馬鞍山思任走緬其地
悉平

史時賊列象爲陣據壘相望衆尙十餘萬驥等追至
五日未決勝負復因風縱火破之賊勢窘迫投水火
及死於鋒鏑者八萬餘遂蕩平其巢穴思任乘船走
緬獲其妻妾象馬金玉無算其子思機狼狽乘夜潛
匿孟養遂移兵討之

維摩州蠻賊韋郎羅反詔王驥移兵討之

史時韋郎羅乘機作亂自稱廣新王事聞命王驥平
麓川後以兵討之驥遣指揮萬城以土兵五千抵賊
境聲言王尙書大兵且至羅郎遁安南僞言借兵驥
檄其守邊頭目黎注諭以禍福安南人斬其首并妻
子來獻

十二月王驥以麓川捷聞降旨褒諭召還

七年春王驥班師還京

史四月上遣戶部左侍郎王質以羊酒途勞蔣貴王
驥凱旋將士悉給廩餼至京上親宴王驥等於奉天

門五月論破麓川功進封蔣貴定西侯王驥靖遠伯
並賜誥券子孫世襲侯璉禮部右侍郎楊安刑部右
侍郎皆以隨軍督戰功其餘陞賚有差是役也王振
主兵而捷土木之禍基之矣

使都知監左少監蕭保鎮守雲南

史上以麓川寇既平故以中官鎮之

冬十月以思任未就俘復命王驥往雲南總督軍務仍
給金牌印符便宜行事

史思任既走未知死亡八月雲南守臣以思任在緬
報聞於是令驥等再督諸軍往取之劉球復上言麓

川連年用兵死者什七八今瘡痍未起又遣遠征縱
得首寇以歸不過獻諸廷礫諸市梟首通道而已倘
緬酋挾以爲功求與木邦分有麓川之地不與則致
怨與之則兩夷地益勢強除一麓川添二麓川也不
若遣人諭緬生致此夷或斬首來獻賜之厚賞仍令
其子思機盡削四面之地分與各寨新附之夷許以
小職仍居麓川則不煩興師動衆而此方可得寧謐
請止蔣貴等總戎并停川湖貴州之兵以全億萬生
靈之命不報十月復命定西侯蔣貴充總兵官都督
冉保毛福壽爲叅將靖伯王驥兼兵部尙書提督

軍務再征麓川

詔提學官三年一次會同州縣正官考選生員

志凡生員中年老殘疾及人物鄙猥悉黜爲民又三年令提學官教官考選生員年四十以上不諳文理者廩膳十年以上送吏部六年以上送附近布政司增廣十年以上送本布政司直隸送本府俱充吏六年以上竝鄙猥殘疾者悉黜爲民雲南貴州免考

八年春王驥率師至金齒遣使諭緬久不奉命遂進兵史驥遣使檄緬縛思任父子來獻緬人佯諾而不行實陰黨任驥曰緬意欲老我師不以大兵臨之賊首

未可得也乃進兵遣僉都御史程富督運食糧貯金
齒兵俱集騰衝分爲五營驥與蔣貴及少監蕭保分
督三營總兵沐昂侍郎侯璉叅將冉保毛福壽率兵
徑擣麓川以陳儀領前鋒三千開南牙山在南甸西
南百八十里斷賊走路

郭登至自緬緬人持思任來獻王驥令蔣貴率師擊之
敗績

史初使還自緬緬欲獻思任且索金帛土地欲以重
臣往取驥難之郭登請行由金沙入緬不十日至其
國卜刺浪來會頗驕騫登折之緬懼乃以董雅叩頭

聽命卜刺浪繼見亦稽首焉登回其國相莽刺劄以
思任載樓船來獻時有嫉登功者乃議留守沙壩刺
劄至貢章不見登遲疑不敢獻驥謂貴曰此給我過
江則絕我歸路也裨將陳儀自詫知天文以爲熒惑
犯輿鬼繩可伐驥信之乃密令蔣貴率師匝江而下
大戰一日夜焚其舟數百艘死者三千人我師敗績
莽刺劄竟持思任去貴子雄追之復敗自刎餘衆盡
陷於江驥悔之是役也但招芒市干崖等三十餘寨
及東路兵克孟平諸寨而思任子思機潛竄僅獲其
象馬妻子而已驥還仍以捷聞

九年王驥班師還京

史驥至京上慰勞如前加驥貴歲祿各三百石

始建金齒司儒學

野史令訓誨武職子弟尙無科貢也

秋七月命刑部右侍郎秦簪軍務楊安巡撫雲南

傳安錢塘人初以刑部郎往諭麓川後從王驥有功
陞至侍郎巡撫雲南安有才畧善撫軍民邊境賴之
以安

蛻按正統五年設立巡撫衙門而亦未有專官大抵
廷臣奉使者皆居之今楊安始真爲巡撫矣顧名思

義安洵不負此官哉

詔設騰衝軍民指揮使司

臨安產嘉禾一莖三穗者匝數畝

麓川叛賊思機男齒蓋等解送至京沒入御馬監

史王驥東路兵克孟平諸寨思機遁獲其妻子解京
八月鄉試雲貴生儒取王鐸等二十人

通志內貴州七名進士羅晟雲南人

十年夏六月鎮守雲南左都督沐昂卒詔黔國公沐斌
還鎮

傳晟卒時麓川方跳梁上命昂佩征南將軍印先後

征麓黔國公沐斌留京未遣今昂卒追封定遠伯諡武襄令沐斌還鎮雲南

冬緬人斬麓川賊思任首獻於軍巡撫侍郎楊安黔國公沐斌露布以聞

史先是勅緬卜刺浪并眾頭目令解獻思任重加陞賞不至洎楊安爲巡撫使人許賞以孟養遺地易思任卜刺浪且懼且喜頓首承命時刁玉賓已故絕遂割思任所有孟養地以畀之卜刺浪以其長子銀起莽居之方函思任首級并妻子賊徒扳蹇等解送軍前楊安等俱露布以聞有曰初疑苗裔之梗虞舜干